

# SKIPULAGSSKRÁ

## fyrir Minningarsjóð Sveins Björnssonar.

### 1. gr.

Mannréttinda- og mannúðarmál eru hornsteinar í starfsemi alþjóðahreyfingar Rauða krossins og Rauða hálfmánans. Til að stuðla að frekari rannsóknum og þróun á þessum sviðum hefur stjórn Rauða kross Íslands ákveðið að stofna sjóð sem kenndur er við minningu Sveins Björnssonar, ríkisstjóra, fyrsta forseta lýðveldisins Íslands og fyrsta formanns Rauða kross Íslands.

### 2. gr.

Sjóðurinn heitir Minningarsjóður Sveins Björnssonar. Heimili hans og varnarþing eru í Reykjavík.

### 3. gr.

Höfuðstóll sjóðsins er kr. 13.000.000, stofnfé frá Rauða krossi Íslands (RKÍ), fjárframlög skv. 3. gr. svo og framlög og gjafir sem sjóðnum kann að áskotnast nema gefendur mæli fyrir um annað, sbr. 6. gr. Aldrei má skerða höfuðstólinn.

### 4. gr.

Tekjur sjóðsins eru raunvextir af höfuðstóli hans. Af árlegum nettótekjum sjóðsins (þ.e. brúttótekjur að frádregnum stjórnunarkostnaði) skulu 10% lögð við höfuðstólinn.

### 5. gr.

Tilgangur sjóðsins er að styrkja rannsóknir á mannréttinda- og mannúðarsamningum og framkvæmd þeirra sem og rannsóknir og starfsemi sem stuðla að þekkingu og þróun á mannréttinda- og mannúðarmálum.

### 6. gr.

Í stjórn sjóðsins sitja framkvæmdastjóri RKÍ og tveir fulltrúar skipaðir af stjórn RKÍ til tveggja ára í senn. Jafnframt skipar stjórn RKÍ þrjá fulltrúa til vara til tveggja ára í senn. Stjórn sjóðsins skiptir með sér verkum.

### 7. gr.

Stjórn sjóðsins skal árlega úthluta styrkjum af tekjum sjóðsins í samræmi við tilgang hans svo og þeim framlögum sem gefendur mæla fyrir um að skuli koma til úthlutunar. Skulu þeir auglýstir í byrjun marsmánaðar og fari úthlutun þeirra fram þann 8. maí.

Einstaklingar skulu að jafnaði ganga fyrir stofnunum um styrki ef umsóknir þeirra teljast sambærilegar. Að öðru leyti skal stjórn sjóðsins semja úthlutunareglur sem væntanlegum umsækjendum gefst kostur að kynna sér.

### 8. gr.

Reikningar og reikningsskil sjóðsins fylgja reikningsári og reikningsskilum RKÍ. Bókhald sjóðsins og reikningshald fer eftir gildandi lögum og góðum reikningsskilavenjum. Ársreikningur sjóðsins skal sendur ríkisendurskoðun.

### 9. gr.

Breytingar á stofnskrá þessari verða aðeins gerðar ef meirihluti stjórnar sjóðsins gerir tillögu þar um og skulu breytingar hljóta samþykki meirihluta stjórnar RKÍ.

## 10. gr.

Ef stjórn sjóðsins og stjórn RKÍ samþykkja einróma að sjóðurinn skuli lagður niður skal allt fé sjóðsins renna til annarra verkefna á vegum RKÍ samkvæmt nánari ákvörðun stjórnar félagsins.

## 11. gr.

Leita skal staðfestingar dóms- og kirkjumálaráðherra á skipulagsskrá þessari.

Reykjavík, 10. desember 1994.

Skipulagsskrá þessi staðfestist hér með samkvæmt lögum um sjóði og stofnanir sem starfa samkvæmt staðfestri skipulagsskrá, nr. 19/1988.

*Dóms- og kirkjumálaráðuneytinu, 26. janúar 1996.*

F. h. r.

**Þorsteinn Geirsson.**

*Jón Thors.*

## GJALDSKRÁ

### vegna sorphirðu fyrir Dalabyggð.

## 1. gr.

Hreppsnefnd Dalabyggðar er árlega heimil álagning sérstaks sorphirðugjalds (sorp-hreinsi- og sorpeyðingargjalds) sem innheimta skal með fasteignagjöldum.

## 2. gr.

Gjaldið er sem hér greinir:

Íbúðir og fyrirtæki í þéttbýli

sorphirðugjald hver eining (160 ltr.) ..... kr. 8.250

Íbúðir í dreifbýli, sumarbústaðir og hús og hjólhýsi

sem notuð eru eins og sumarbústaðir ..... kr. 3.300

Fyrirtæki sem ekki hafa sorpílát ..... kr. 3.300

Þeir sem leigja eða reka eigin sorpílát samkvæmt 2. mgr. 3. gr. samþykktar um sorphirðu í Dalabyggð nr. 171/1995 eru gjaldfrjálsir.

## 3. gr.

Gjaldskrá þessi, sem er samin og samþykkt af hreppsnefnd Dalabyggðar, staðfestist hér með samkvæmt 22. gr. laga nr. 81/1988 um hollustuhætti og heilbrigðiseftirlit til að öðlast gildi nú þegar.

Frá sama tíma fellur úr gildi gjaldskrá nr. 178/1995 vegna sorphirðu í Dalabyggð.

*Umhverfisstjórnuneytinu, 29. janúar 1995.*

F. h. r.

**Ingimar Sigurðsson.**

*Sigurbjörg Sæmundsdóttir.*